

## Қонун ҳужжатларининг рақобатга таъсирини баҳолаш бўйича ХУЛОСА

### I. Умумий маълумотлар

Хулоса Адлия вазирлигида 2019 йил 19 апрелда 3155-сон билан рўйхатга олинган Қонун ҳужжатларининг рақобатга таъсирини баҳолаш методикаси асосида тайёрланди.

**1. Лойиҳани тақдим этувчи орган номи:**

Ўзбекистон Республикаси Вазирлар Маҳкамаси.

**2. Лойиҳанинг номи ва тури:**

Ўзбекистон Республикаси Президентининг қарори лойиҳаси.

**3. Лойиҳани ишлаб чиқиш учун асос:**

Ташаббускорлик асосида.

**4. Лойиҳанинг қисқача мазмуни:**

Инвестицион жозибadorлигини ошириш, машинасозлик тармоғида соғлом рақобат муҳитини яратиш, алоҳида тақдим этилган имтиёз ва преференцияларни тартибга солиш, эҳтиёт қисмларни маҳаллийлаштиришни рағбатлантириш кўзда тутилган.

### II. Тадбиркорлик субъектларининг асосий гуруҳлари бошқа масъул шахслар ҳамда таклиф этилаётган ҳужжатда давлат органларининг манфаатларига доир масалалар тартибга солинадиган маълумотлар

**5. Ҳужжат билан манфаатлари назарда тутилаётган гуруҳ иштирокчиларининг таснифи:**

тадбиркорлик субъектлари гуруҳлари – “Kgapras Group” МЧЖ;

давлат органлари гуруҳи – Ўзбекистон Республикаси Инвестициялар ва ташқи савдо вазирлиги, Иқтисодий тараққиёт ва камбағалликни қисқартириш вазирлиги, Молия вазирлиги;

бошқа иштирокчилар гуруҳи муносабатлари – мавжуд эмас.

**6. Янги ёки амалдаги функцияларга киритилаётган ўзгартиришлар, ваколатлар, мажбуриятлар, имтиёзлар, преференциялар, давлат органлари ҳуқуқлари ва уларни амалга ошириш тартиби тўғрисида, шунингдек, киритилилаётган чекловлар бўйича ҳамда бошқа маълумотлар:**

**6.1. Қарор лойиҳасининг 2-бандида:**

“Kgapras Group” МЧЖ томонидан жорий йилдан бошлаб маҳаллийлаштириш даражаси 20 фоиз ва ундан юқори бўлган галла ўриш комбайнлари ва универсал чопиқ тракторлари ишлаб чиқарилаётганлиги маълумот учун қабул қилинсин.

“Kgapras Group” МЧЖ томонидан қишлоқ хўжалиги техникаларини ишлаб чиқариш учун импорт қилинган хом-ашё, бутловчи ва эҳтиёт қисмлари

ҳамда намуна сифатида бир донадан олиб кирилган Sampo Rosenlew Comia C8, C12 русумидаги ғалла ўриш комбайни 2020 йил 1 январдан бошлаб божхона тўловларидан (қўшилган қиймат солиғи ва божхона йиғимидан ташқари) озод қилинсин деб кўрсатилган.

### **III. Рақобатга таъсирнинг таҳлили**

#### **7. Ҳужжатни қабул қилинишининг оқибатлари прогнози**

7.1. Ўзбекистон Республикаси “Рақобат тўғрисида”ги Қонунининг 12-моддасига мувофиқ, давлат бошқаруви органлари ва маҳаллий давлат ҳокимияти органларининг айрим хўжалик юритувчи субъектларга уларни товар ёки молия бозорида фаолият кўрсатаётган **бошқа хўжалик юритувчи субъектларга нисбатан афзал ҳолатга қўядиган имтиёзлар, преференциялар ва енгилликларни асоссиз равишда бериши таъқиқланиши кўрсатилган.**

Ўзбекистон Республикаси Президентининг 2017 йил 8 сентябрдаги ПФ-5185-сон Фармони билан тасдиқланган “Ўзбекистон Республикасида Маъмурий ислохотлар Концепцияси”да хусусий сектор самарали фаолият кўрсатаётган соҳаларда давлат иштирокидаги тижорат ташкилотларини тузишга чеклов чораларини белгилаш ва амалдаги корхоналарни қайта ташкил этиш, шунингдек, соғлом рақобат муҳитининг ривожланишини чеклаётган алоҳида хўжалик юритувчи субъектларга эксклюзив ҳуқуқлар, индивидуал имтиёзлар ҳамда преференциялар **бериш амалиётидан воз кечиш** кўрсатилган.

Шунингдек, Ўзбекистон Республикаси Президентининг 2018 йил 31 майдаги “Имтиёзлар ва преференциялар бериш тартибини тубдан такомиллаштириш чора-тадбирлари тўғрисида”ги ПҚ-3756-сонли қарорига асосан солиқ ва божхона имтиёзлари ҳамда преференциялар қонунлар ва Ўзбекистон Республикаси Президенти ҳужжатлари билан **умуман тармоқлар, фаолият соҳалари, ҳудудлар учун берилиши**, вақтинчалик имтиёзлар Ўзбекистон Республикаси Президенти ҳужжатлари билан 3 йилдан ортиқ бўлмаган муддатга берилиши, индивидуал имтиёзлар, алоҳида ҳолларда, хусусий сектор инвестиция киритишдан манфаатдор бўлмаган тармоқларда ижтимоий аҳамиятга эга лойиҳаларни амалга ошириш учун, аниқ ижтимоий ёки иқтисодий асослар мавжуд бўлганда ёхуд Ўзбекистон Республикасининг халқаро шартномаларига мувофиқ, Ўзбекистон Республикаси Президенти ҳужжатлари билан берилиши кўрсатилган.

Шунингдек, Ўзбекистон Республикаси “Норматив-ҳуқуқий ҳужжатлар тўғрисида”ги Қонунининг 31-моддасига асосан норматив-ҳуқуқий ҳужжатлар **орқага қайтиш кучига эга эмас** ва улар амалга киритилганидан кейин юзага келган ижтимоий муносабатларга нисбатан татбиқ этилади.

Юқоридагиларни инобатга олиб, қарор лойиҳасининг 2-бандини чиқариб ташлаш лозим.

#### IV. ХУЛОСА

Юқоридагилардан келиб чиқиб, ушбу Қарор лойиҳаси 2-банди Ўзбекистон Республикаси “Норматив-ҳуқуқий ҳужжатлар тўғрисида”ги Қонунининг 31-моддаси талабларига зид эканлиги, бошқа хўжалик юритувчи субъектларга нисбатан афзал ҳолатга қўядиган имтиёзлар, преференциялар ва енгилликлар берилиши “Рақобат тўғрисида”ги Қонуннинг 12-моддасига, Ўзбекистон Республикаси Президентининг 2017 йил 8 сентябрдаги ПФ-5185-сон Фармони билан тасдиқланган Ўзбекистон Республикасида Маъмурий ислохотлар Концепциясига, Ўзбекистон Республикаси Президентининг 2018 йил 31 майдаги ПҚ-3756-сонли қарори талабларига зид эканлигини инобатга олиб, қарор лойиҳаси 2-банди чиқариб ташлагандан сўнг, қабул қилиниши мақсадга мувофиқ ҳисобланади.